

四庫全書

子部

欽定四庫全書

子部
居易錄卷十三
五至

詳校官侍讀_臣陳崇本

員外郎_臣牛稔文覆勘

總校官中書_臣朱 鈐

校對官中書_臣方大川

謄錄監生_臣范光謙

欽定四庫全書

居易錄卷十三

刑部尚書王士禎撰

予曩與亡友葉文敏論牛李之黨李為君子牛為小人
勿論兩人本末即視其所與之友可知文敏不甚以為
然適觀晉山唐庚集寄郭潛夫詩云黔江清且碧瀘江
濁而紅須臾盡變濁混混顏色同清固不勝濁此理天
下通君視開成間牛李爭長雄卒之贊皇老不勝太牢
公物理自古然徘徊歎無窮因憶吾前之持論非謬而

文敏或別有見未必然也葉石林云李德裕是唐中世
第一流人物可與姚崇並立而不至為崇之權譎使武
宗之才如明皇之初則開元不難致良然

生男胎衣名紫河車別有草藥亦名紫河車生楚蜀峽
山中范石湖詠之云綠英吐弱線翠葉抱修莖蠹如青
旄節草中立亭亭根有却老藥鱗皴友松苓詩見石湖
集

宋臨川王世說雖儇巧而有文外之味予已未年在翰

林曾見吳容攜二秩索重價求售其一南唐昇元閣帖
其一則宋槧本晉宋奇談略似世說忘撰人姓名至今
恨之又予家有唐語林乃德州盧御史世濬德水鈔本
宋孔平仲作續世說今不傳何良俊作語林以廣世說
其書最傳焦竑作類林錢唐張墉作廿一史識餘頗存
古意廣信鄭仲夔作清言粗得一鱗半甲耳近頗從喬
作僧世說王暉作今世說汪琬作說鈴皆倣而為之者
王汪二書記予輩酒茗間語最多要是本色人難學

耳

閏七月十八日內閣大學士學士傳

旨問九卿以故吏部尚書鄂爾多應行謚法否皆稱其老成持重云先是故內閣大學士兼禮部尚書杜立德訃聞亦詢九卿然後

予謚蓋易名之典其慎如此按明制京官三品已上例予謚其品秩未高而侍從有勞或以勤事者不拘成例本朝則六卿總憲始得

賜諡侍郎得諡者無幾人然諡具美惡上有

睿裁下有清議亦不但以有無為優劣也

大明會典載洪武初議諡

俱禮部奉旨施行二十五年令本部行翰林院議奏請旨又本部行吏兵二部備查實蹟定為上中下三等以行業俱優者為上行實頗可者為中行實無取者為下開送翰林院擬諡請旨

本朝則歸之內閣司之典籍云

南史邱仲孚傳每讀書以中宵鐘為限墨客揮犀云古有分夜鐘則議張繼楓橋夜泊詩者真兒童之見也

翡翠產粵中予于皇華紀聞詳其族類然所謂翡翠屑

金乃別自一物歸田錄歐陽永叔家有玉罌一形製甚古以為碧玉在穎以示座客有兵馬鈴轄鄧保吉者真宗朝老內臣也識之曰此寶器名翡翠宜聖庫有翡翠琖一隻所以識也後偶以金鑲於罌腹信手磨之金屑紛紛而落始知翡翠能屑金也則翡翠又玉石之屬

予自初仕揚州李官至叨九列三十年間往往謬司文衡順治庚子江南鄉試為同考官分較易二房得盛符

升

甲辰進士
監察御史

等十人康熙癸卯江南武鄉試為同考官

得邱湛

甲辰武會元

等十九人壬子以戶部郎中為四川鄉

試正考官得楊兆龍等四十二人副之者工部員外郎

貴溪鄭公日奎戊午以翰林院侍讀為順天武鄉試正

考官得王來泰等一百八十六人副之者侍講今內閣

學士兼禮部侍郎韓公炎是榜羅淇中己未武狀元

湖州

副將徐憲武中壬戌武狀元

貴州副將

繳煜章中丁丑武狀元

山西參將庚申遷國子監祭酒辛酉甲子兩值科試矢公甄

拔得士尤衆如壬戌之史夔

春坊中允

等乙丑之高耀

編修金

居敬

靈邱知縣

等戊辰之湯右曾

編修改給事中

查嗣韓

榜眼編修

查昇

編修

等不下數十人率皆一時名士辛未會試為考試官

同事者文華殿大學士兼戶部尚書張公玉書工部尚

書陳公廷敬兵部右侍郎李公光地也得張瑗

編修改御史

等一百五十六人而前在揚州日所賞拔士如許承宣

丙辰進士給事中

許承家

乙丑進士編修

汪懋麟

丁未進士刑部主事

喬萊

丁未進士

侍讀汪楫

己未召試

檢許嗣隆

壬戌進士

檢吳世燾

戊辰進士

編修張

張

張

琴

癸丑進士中書舍人劉長發

丁未進士張楷

丁未進士張琬

彭

延平知府

張琬

彭

士右夏九叙王司龍之屬以文章登科甲者亦不下數十人予幸生右文之代獲以文事自効略抒其推賢進達之義少逭罪戾詎非天幸聊疏其概用示吾子孫云少保兼太子太保昭武將軍提督江南總兵官楊捷卒賜諡敏壯捷字元凱義州人予官揚州時與定交甚契後兩為山東提督文武協和兵民安堵武臣中之賢者也甲子

上南巡捷朝

行在慰勞甚至稱老將軍蓋異數云

吳郡門人惠周惕著詩說三卷言博而辨不主故常可
備說詩一家之言周惕字元龍康熙己酉予在淮陰始
來執贄及予為祭酒又從遊太學辛未會試予以兵部
侍郎為考試官周惕適以第六人中第入翰林

以禮部左侍郎掌翰林院事庫勒納為戶部尚書通政
使司通政使兼掌詹事府事尹泰為都察院左副都御
史仍掌通政司詹事府事康熙元年已來一人兼掌三

衙門者尹泰公及張公英也一人兼掌兩衙門者禮部左侍郎兼太常寺卿席爾達公也

以左通政劉元慧為都察院僉都御史羅秉倫為光祿寺卿

八月初一日保和殿大學士兼兵部尚書梁清標卒于位公真定人崇禎癸未進士卒年七十二無論公與故大學士大名成公克鞏寶坻杜公立德皆直隸人又皆癸未進士至是前後卒公早登館閣拜大司馬年未四

十歷戶禮兵刑四部尚書康熙戊辰以兵書大拜在相
位甫三年公精賞鑒蒐羅金石文字書畫鼎彝之屬甲
于海內領袖詞林數十年風流宏長歸然為鉅人長德
予順治中未弱冠偕計吏入京師公與合肥龔端毅公
鼎知知之尤深在禮部戶部為郎日又為公屬每放衙吏
散必引與論文章究風雅相期在吏牒之外龔公以癸

丑厭世又十九年而公卒

公家世翔貴甲于河朔曾祖夢龍明吏部尚書謚貞敏兄

清寬吏部侍郎從兄清遠吏部侍郎公亦以吏部侍郎拜兵部尚書祖孫兄弟四人吏部前後相望縉紳榮之

吉顓間鳥有名功曹主簿者故予過秦和有詩云木客
山都人比舍功曹主簿鳥多名茅亭客話云孔雀名都
護酉陽雜俎云齊郡函山有鳥名王母使者

俗失物炙狼筋即得段成式云武宗四年官市郎巾因
言僧秦賢為涇帥段祐就西市賈胡市郎巾至修竹南
街金吾鋪偶問官健朱秀曰甚易得但人不識耳即于
古培摘出三枚如巨蟲兩頭光帶黃色祐集奴婢環庭
炙之蟲慄蠕動一女奴脣潤動詰之果竊器者則郎

巾別是一蟲今傳訛作狼筋耳

己巳冬十二月戶部主事族姪郝以前文登令行取需次都下遣其族子景修歸鄆縣行至獲鹿遇于自保等五人約同行不知其盜也早行至柏井鎮西擄殺景修而奪其貲及所乘牝馬去人莫知也既復東行途次遇裕親王府護衛自山西勾當公事回京者與秦人候補守備某某偕行至胡桃園皆宿焉明日盜早行而舍其牝馬既而王府護衛行馬自高崖躍下從之屢麾不去

午次榆林鎮馬忽奔馳入一店隨視之則自保等在焉
詰其縱馬之故不服二守備搜其裝得景修路引曰此
吾秦人也今安在盜語塞護衛縛諸盜詣保定巡撫于
中丞

成龍

鞫之盜乃吐實皆論斬馬之報寃奇矣

春秋左傳類對賦一卷似連珠體宋將仕郎試祕書省
校書郎徐晉卿撰海昌重刊本晉卿自序云余讀五經
酷好春秋治春秋三傳雅尚左氏然義理牽合卷帙繁
多顧茲諉聞難以殫記乃以暇日撰成錄賦一篇凡一

百五十韻計一萬五千言首尾貫穿十得其九命曰春秋經傳類對賦北宋人也又有元至大戊申長沙教授區斗英跋云是賦乃徐祕書所作江陵路總管太原趙嘉山得善本授之郡庠俾鏤梓以淑諸生予觀其比事屬辭頗自斐然然無關經傳要義大抵宋人著述如事類賦蒙求之類皆類俳體取便記誦云爾

康熙庚戌冬沛縣閭爾梅古古在京師先考功兄召同吳江顧萬祺庶其飲予在座閭老而狂好使酒罵坐酒

間愚兄弟叩其所作閭朗誦數篇顧以前輩事閭執禮
甚恭至是起贊曰先生詩不減杜少陵矣閭勃然怒直
視顧曰小子何知何物杜甫輒以況我耶顧面色如土
踖踖而已予殊惡閭之僭誕思抵巇以折其氣有頃閭
又自舉其雲中與曹侍郎秋岳倡和近體詩當日戰場
成遇禮至今兵氣滿寒空地高天近星辰大春少秋多
草木窮云云予曰先生此詩可追空同黃河水遶漢宮
牆之作閭大悅曰知言哉向者芝麓

謂合肥
龍端毅

云有詩當

示西樵阮亭兄弟信然予徐笑曰知言某不敢當然有
一言相質先生謂李獻吉顧出杜子美上乎閭愕然曰
何謂也予曰適顧生以子美擬先生某私以為太過而
先生怒斥之某以獻吉擬先生而先生乃大喜然則獻
吉不遠過子美乎此某所未喻也閤赧甚不能答但連
呼曰不必言且可飲酒耳未久遁去明日西樵謂予弟
昨困此老已甚予觀閤作但工七言八句然率有句無
篇又皆客氣不合古人風調至七言古詩并音節亦不

解直如瞽詞信口演說世人但為其氣岸所奪耳自法
眼觀之不免野狐外道

門人盛御史符升珍示云佛手拈臨水種之則多實花
色白或五出或六出陽月結實如指陰月結實如拳

吳草廬于諸經皆有纂言詩獨無之禮纂言予家舊有
刊本易纂言康熙丙辰得之京師亦刊本也書纂言寫
本已巳冬初入都借之黃虞稷俞邵獨未見春秋耳朱
檢討云曾從吳郡陸醫其清家藏書見之

今人賦詩用事不詳出處謬相沿最為可笑如彈碁
之戲西京雜記云成帝好蹴鞠羣臣以為勞體非至尊
所宜帝曰可擇似而不勞者奏之家君歌謂向也作彈碁以
獻博物志云魏文帝善彈碁能手巾角時有書生又
能低頭以所冠著葛巾角撇碁故李義山詩云玉作彈
碁局中心最不平此與奕碁有何干涉而今人率以奕
為彈碁此類甚多

戊午夏予與翰林掌院學士今刑部尚書澤州陳公

敬

侍讀學士故刑部侍郎諡文敏崑山葉公

方

侍講學士

今禮部尚書桐城張公

英

同內直每有

御製必

命和進一日

賜侍衛輔國公俄啓詩云觀德由來尚古風手彎滿月

綠沈弓云云俄啓蓋以宗室宿衛有穿楊貫札之能故

聖製云然

臣士禎

恭和云

宸章高視漢歌風絕藝爭誇兩石弓自是

君王勤拊髀一時龍種盡英雄蓋此題有三難

御製首倡一也旌俄啓之射二也宗室而兼宿衛三也
詩僅四句包此三義所以難也壬戌

賜宴

乾清宮賦昇平嘉宴倣柏梁體詩

御製首倡云麗日和風被萬方和者自內閣大學士已

下凡若干人士禎時以祭酒領成均句云三德六行為

士坊翊日詩成恭進

上手製詩序

御書之詩則

詔故詹事禮部侍郎沈文恪荃書之刻石養心殿摹搨
裝潢九月九日

宣賜與宴諸臣人一本真昇平盛事云

張仁熙字長人楚之廣濟人隱居著書與竟陵胡承諾
君信吳驥既閑蘄州顧景星黃公皆前代逸民有名江
漢間庚午冬寄予書時年八十矣書云仁熙間之古稱

一代人文必有英絕領袖之者翺湜籍漢之於退之黃
鼎張秦之於子瞻是也而昌黎與于襄陽書則曰或為
之先焉或為之後焉取其責均肩之蓋原本孟氏之旨
以高其自據之地僕則以為不然僕以為非真有憂世
覺民之責如孟子者皆當遁迹利名謝絕丐乞豹霧冥
冥枯槁自腴即間有須之殷而遇或疎者合有道得有
緣迹其間殆非一死生一旦夕之故如俗所稱知己無
憾者此夙契也而或因以為奔競砥焉何至如昌黎慄

慨沾沾類有所挾而至耶至于上之人一處高位汲汲求賢以奠邦國安民人其於名譽之士長養而成就之其無所挾固明矣僕少孤岷岵無瞻稍長知讀書亦嘗手執經卷山椒水涯青燐白骨口不絕吟於兵賊疫饑之中年踰壯多病即決棄科目文字昔人有云王仲宣泥下潛蛙何由翼繡虎哉甲辰曾一過都門聞濟南領袖復有先生時苦京寓雜運一月即歸歸而商邱宋牧仲通守黃州迎至雪堂訓其子弟屢道先生已酉商邱

別去忽忽十五年商邱移節通州兒子佳歲因會試入
通見長者商邱為致先生倡和評點種種大序且曰近
與阮亭宮詹屈指海內耆舊江漢間僕與顧黃公耳僕
心異之已而捧讀漁洋集天韻標令穎識通遠間出光
怪包合韓蘇而士之遊先生門者靡不曰入阮亭之室
而緒其派當世之頌說北面竊先生以為名者種種而
僕終不敢楮墨付兒輩入都者上謁則僕硜硜小人所
謂遁迹利名謝絕丐乞者也數年以來僕日益老食壤

之蚓日是不留逾益閑影謝客而敝友金蔚齋尺牘數
千里道先生繾綣下垂不已或曰秋水蒹葭或曰癖嗜
項說至欲頌尺素下遺詫以為素未邂逅而神交若此
且曰王先生退居古處至勤

聖天子召問便殿拔之侍從僕至此殆不能矜小節而
嘿嘿于大君子之前矣大君子本領鑪錘俾一切心儀
古聖者旅大海而得指南又不第千古著述何幸如之
僕樸遯山林不敢附於作者三十年前誤聽友人為刻

詩文少許向溷高賢視聽者即此本也近亦增稿數帙其稍異於前者詩有山川酬答之作文多史傳論列之言貧艱繕寫排正仍以舊本付小兒獻之閣下昔謝元暉好獎聲名未達之士孔閨聲施張茂先不棄窮巷侯門一分之善遂羅英傑僕杜門已久枯槁自娛然仰先達以重生冀修名於不朽雖古賢高隱間亦不廢王山子一字拔人黃公衡不去口實或不至薄崔彥烈片言自達也翹首俟命

太倉周瓚元恭以南公菴稿相示所撰明史稿也中間載先太師先方伯先侍御事略頗具瓚熟史事梅村晚年招與讀書或事有疑誤輒就問之瓚庚午夏遺予書曰瓚於三十年前知有阮亭先生者非今之人而古之君子也意欲望見顏色而生於江南蒿蘆之下志氣奔鄙見聞單陋無以具行李又為同里梅村先生留訂春秋諸書朝夕晤對垂二十年弗獲造先生之門親奉聲歎梅村歿後饑驅出門糊其口於

四方又逾十年而年漸遲暮自傷將終不得見先生
矣去年踐故人之訂策蹇北來私心自喜可以一見
先生而才至都門疾病顛連一身孑然及健菴南歸
寄食同里錢黃門之邸暫為蒙師嗟乎如瓚之遭逢
亦可謂之不幸矣惟是先生為一代之名賢三十年
所願見而不可得者今既在此詎可覲面失之然又
不敢貿貿而前遂恐終不得見故以一言介於左右
瓚自少有志於史於有明三百年之人物粗有纂輯

然中間尚缺十之二三而貧家無藏書可以考證又自以才之不充學之不裕識之不確未敢出而問世藏棄篋中有年矣前則梅村後則健菴俱未寓目今欲是正於先生乃既無紙筆又無書人草稿塗乙不可以瀆高明終欲就先生謀之倘不棄微賤而辱見焉則請蠲吉以進幸甚

命太常少卿沙拜巡視廣東廣西鹽課閩粵鹽課舊以巡撫兼理之至是始專差朝官亦由都察院題請但不

傳差御史允兵科給事中卞三畏之請也

前太子太傅武英殿大學士兼禮部尚書吳正治卒于江寧公漢陽人順治己丑進士卒年七十五

友人自粵東遺書寄文待詔畫江南春卷長丈許山水間多作招提蘭若中幅及卷盡處兩作瀑布最為奇絕卷首江南春三篆字卷尾嘉靖丙辰春日製七字皆待詔自署書

前文華殿大學士兼戶部尚書徐元文卒公崑山人順

治己亥狀元及第卒年五十八

命宗人府副理事官吳爾泰巡視福建鹽課

鄒平長白山有釋宗泐季潭石刻手蹟古今詩十五首
後題云右諸詩皆予洪武初雜處亂軍中迄今已三十
年偶持鉢過長白山宿劉老別業憶舊作書之惛然自
失時永樂二年九月天台釋宗泐滄溟跋尾云此長白
山名蹟也嘉靖乙丑三月歷下李攀龍書其詩如戰城
南江南曲祖龍行等作列朝詩皆載之按季潭以胡惟

庸之獄有連奉旨免死命往鳳陽槎峰至江浦石佛寺
示寂壽七十四事在洪武間而此刻署永樂二年必有
訛誤記之以俟考

無錫侯氏新刊十家樂府南唐二主

中主四首後主三十三首

馮延

巳陽春集

宋嘉祐陳世修序序謂馮遠圖長策不矜不伐云云

子野

張先

東湖

賀鑄

信

齋

葛剌

竹洲

吳儆

虛齋

趙以夫有淳祐己酉芝山老人自序

松雪

趙孟頫

天錫

薩都

刺古山

張堃卽鄆人有至治初元臨川李長翁序

皆在毛氏宋詞六十家之

外向見宋牧仲中丞所得李長文

唱學士

鈔本數十家

不甚流傳者尚多有之恐不止此也

都察院左副都御史衛既齊改右副都御史巡撫貴州

巡撫僉都御史
田雯以內艱歸

宋貴充墨前卷屢載之晁氏墨經云今兗州泰山徂徠

山二山今屬濟南鳧山嶧山沂州龜山蒙山密州今諸城九仙山

登州牢山即大勞小勞二山皆產松之所兗沂登密之山總謂

之東山東山之松色澤肥膩性質沈重品惟上上工則

兗州陳朗朗弟遠遠子惟進惟迨與易水奚氏並稱又

東坡題跋云此墨充人東野暉所製每枚必十千信非凡墨之比東野氏周公之裔至今居曲阜云

同年成愚崑

其範

青州樂安人通知天文賊據岳州官軍

未即攻拔成時為御史密疏言當于某月日克復岳州已而捷至如所言後長沙之捷雲南會城之捷皆密疏克復時日不爽遂內擢通政司參議超拜太常寺卿進兵部右侍郎罷歸

余家與臨邑邢太僕子愿

侗

為婚姻故先祖方伯贈侍

郎公得其手蹟為多亂後盡化劫灰矣惟蘭亭序白鸚

鵝賦

王摩詰

二卷僅存余兄弟幼時從先祭酒府君侍坐

隅公顧謂曰邢書吾所珍愛今僅存二卷汝輩先取科

第者當得之勿負期望順治戊子先吏部西樵兄舉鄉

試公喜以蘭亭卷賜之辛卯余未弱冠繼舉公尤喜又

以白鸚鵝卷賜之此卷曹侍郎秋岳

溶

周侍郎櫟園

亮

諸公皆有題跋記事

先方伯公有知人之鑒年九十餘聰明不衰嘗語祭酒

公曰汝諸子皆佳將來成進士者三人某某是也幼者

尤早達既而先西樵兄

士祿

以順治壬辰不肖

士禎

以順治

乙未先東亭兄

士祐

以康熙庚戌相繼成進士而

士禎

得雋

尤早異哉長兄壬辰會試

士禎

辛卯鄉試公皆及見之

李侍講

澄中

渭清言滇黔山水奇勝當以憑虛清溪二洞

為冠清溪石筍最奇多不可以數計憑虛有大士羅漢

像皆鍾乳滴成最上有萬年田石方畝許縱橫界畫皆

如町畦之狀人工刻鏤不及也二洞之奇在飛雲巖之

上

又言五華山在滇城中明初命黔國鎮雲南畫滇城形
勢進呈請建府第之所太祖指五華曰此山有王氣宜
建寺于山巔其後永明王改建宮殿至吳世璠作逆又
居之明祖之言卒驗

諸城古東武即宋密州坡公超然臺在焉縣學有石刻
坡八分書云明叔傳道禹功子瞻遊軾凡十字坡書滿
天下而八分僅見此石

東粵石刻惟湑陽峽周夔到難一篇最古予皇華紀聞
記之讀郭功父青山集補到難篇詩云文格迴欺韓愈
老字書尤逼小王真蓋宋人已珍重之如此此文姚鉉
收之文粹碧瀾之下寸寸秋色乃篇中奇語元遺山詩
云碧瀾寸寸皆秋色空對山靈說到難

八字說文引爾雅云西至于八國八西極之水也府中
切杜牧送孟遲先輩詩小溪光八八自注普八切宋黃
仁傑夔州苦雨詩八月不虛為朽月今年賴得是豐年

八音怕平聲東方朔傳令壺齟老柏塗塗與八同注云
丈加切

粵人食檳榔用萋葉牡蠣灰雜裹之葉即扶留藤一名
獲扶留一名南扶留顧微廣州記曰其花實即蒟也蛤
名古賁燒以為灰曰牡蠣粉詳齊民要術又吳都賦曰
東風浮留廣州記東風華葉似落娠婦莖紫作羹味如
酪香氣似馬蘭

爾雅購蒟萋郭璞注蒟萋萋蒿也生下田初出可啖江

東用羹魚故坡詩云萋蒿滿地蘆芽短正是河豚欲上時七字非泛詠景物可見坡詩無一字無來歷也

爾雅曰荼苦菜可食齊民要術引詩義疏曰山田苦菜甜所謂堇荼如飴又爾雅曰檟苦茶郭璞注云樹小似梔子冬生葉可煮作羹飲今呼早采者為茶晚取者為茗一名薺蜀人名之苦茶齊民要術引博物志曰飲真茶令人少眠前人乃謂古無茶字以茶即是茶大謬

皇覽家記孔子冢塋中樹數百皆異種有柞枌維離女

貞五味罌檀之屬

以都察院左僉都御史劉元慧為順天府府尹

府尹陳肇昌以

病請告

命禮部尚書熊賜履工部右侍郎王承祖為武會試主考官戶科給事中王原祁戶部郎中羅大美禮部郎中莫之翰刑部郎中宋嗣京為同考官

詩四始五際按詩緯汎厯樞曰大明在亥金始也四牡在寅木始也嘉魚在巳火始也鴻雁在申金始也卯天

保也酉祈父也午采芑也亥大明也午亥之際為革命
卯酉之際為改正辰者天門出入退聽

以通政使司通政使黃斐為都察院左副都御史大理
寺少卿宮夢仁為都察院左僉都御史

九月二十一日九卿啓

奏會議直隸巡撫郭世隆請停大計一疏三年大計仍
舊行二年舉劾應停止

二十二日未刻

駕由景運門出

御文華殿經筵講官滿洲戶部尚書庫勒納禮部尚書
顧八代工部尚書石柱戶部左侍郎阿山禮部左右侍
郎席爾達多奇刑部左侍郎傅臘塔漢吏部尚書李天
馥禮部尚書熊賜履兵部尚書杜臻刑部尚書陳廷敬
吏部左侍郎李振裕兵部督捕右侍郎王士禎翰林院
掌院學士兼禮部侍郎兼掌詹事府事張英內閣學士
兼禮部侍郎彭孫適尚書庫勒納陳廷敬講四書放勲

曰一段侍郎傅臘塔學士張英講周易立天之道一節講畢
駕還宮

賜宴太和殿前

二十五日

朝審畢過慈仁寺閱故書攤買得陶隱居集三卷嘉靖
中賴人黃吏部注汝霖刊於虔州宋禮部侍郎王欽臣
所集也有注及吉郡胡直序陳侍中尚書令江總元序
又二曹詩集各三卷唐詩人鄴唐二曹也一臨桂人一

陽朔人皆西粵產有蔣文定公冕序文定亦粵全州產此集謝肇淛在杭刊于桂林曹學佺能始序之

李少司馬厚菴

光地

戲謂予昔人謂讀書聲紡績聲凡人

家不可不有公在會議朝審班中屢有正論不肯唯阿此聲亦

朝廷之上不可不有者也

命戶部侍郎博濟兵部侍郎李光地工部侍郎徐廷璽
閔視淮揚等處河工

以太常寺卿周之麟為通政使司通政使太僕寺卿唐朝彝為太常寺卿

予過江西建昌縣南渡修水岸上有亭貯白樂天詩碣一絕句云脩江江水縣門前立馬教人喚渡船好似當年歸蔡渡草風莎雨渭河邊愛其風調然未詳蔡渡所在偶閱渭南縣圖經云渭水至臨潼縣交口渡東入渭南境又東折至縣城北曰上漲渡又東南流曰下漲渡又東北折而流曰蔡渡以漢孝子蔡順得名其地有蔡順

碑與樂天故居紫蘭村正隔渭河一水耳

居易錄卷十三

欽定四庫全書

居易錄卷十四

刑部尚書王士禎撰

予少喜徐渭詩句椎牛千嶂外騎象百蠻中昔使蜀有詩三百餘篇凡四押蠻字云秋河落百蠻飛鳥入南蠻江山真萬里雨雪到諸蠻客心爭歲暮猶自滯烏蠻及使粵又有句云鬢從五嶺白山入百蠻青後有談者未知可追蹤文長否耳

竟陵胡承諾字君信博學工詩尤長五言予官廣陵日

君信以集見寄三十年矣君信以康熙辛酉卒年七十
五其從孫泌謁選來京師言君信老而嗜學晝夜不輟
所著有繹志數十篇讀書說若干卷泌明太僕卿承詔
之孫太僕萬厯甲辰進士先方伯贈侍郎公同年也

十二月十一日前太子太傅文華殿大學士兼刑部尚
書馮溥卒公益都人本籍臨朐順治丙戌會試中式丁
亥進士卒年八十三是歲內閣大學士卒者凡六人

門人陳僖謁公清苑人以古文名河北有燕山草堂集

若干卷來京師弔真定梁公示予上谷殉節紀事敘述
甲申流賊之變邵同知宗玄張光祿羅彥金御史毓峒
諸公事蹟甚得太史公筆

故禮部尚書王文貞公

崇簡

箋記云奏疏揭其要書于後

謂之貼黃外封所書事日月日謂之引黃明崇禎元年
輔臣李文敏公國楷請章奏倣古貼黃之法撮節要粘元
本以進至今因之

陳僖酒間述崇禎中浙西舉人祝淵北遊上谷寓其家

一日與僖父

闕字

翁飲酒酣忽發憤曰丈夫負此七尺

貴有傳于後世耳吾欲以詩文自見則當世已有某某
度不能與爭名方今可為之事惟上書救石齋耳石齋
謂漳浦也明日遂入京師詣長安門上疏論救予門杖
舊例門杖甚于廷杖十死八九祝談笑解衣無恐怖色
監杖內闕曰奇男子也令輕其罰真定梁金吾清宏左右
護持之得遣戍蓋明季士人好名如此

予家自太僕司徒二公發祥然藏書尚少至司馬方伯

二公藏書頗具矣亂後盡燬兵火予兄弟宦遊南北稍復收緝康熙乙巳自揚州歸惟圖書數十篋而已官都下二十餘載俸錢之入盡以買書嘗冬日過慈仁寺市見孔安國尚書大傳朱子儀禮經傳通解荀悅袁宏漢紀欲購之異日侵晨往索已為他人所有歸來怊悵不可釋病臥旬日始起古稱書淫書癖未知視予何如自知玩物喪志故是一病不能改也亦欲使吾子孫知之朱翰林竹垞嘗為予作池北書庫記

凡祭祀進少牢以黃旗前導一羊居前謂之引羊引羊終身豢用之不復屠宰少司馬朱都納公說如此

康熙庚午歲浙東諸郡縣驟雨山中多起蛟蜃而餘姚尤甚水高于城堞幾至陸沉山陰沈進士五鼎說姚有城居之民負販他出聞水漲急操小舟歸視其家甫至城門水已踰城下注乃冒水入見一物頭角鬚鬣如世所繪畫蛟龍狀其身則烟霧擁之不可辨奮迅突門而出驚懼仆地移時始甦已失所在尋其家則為澤國矣

辛未十月初三日

仁憲皇太后萬壽節是日奉

慈寧旨免行禮而法司乃先一日傳集九卿于天安門
議朝審會稿予以為是日雖有

旨免行慶賀禮而各衙門不理刑名況于朝堂集議之
大者乎大體所關改日為是力言之乃各散去

九月十八日

上諭諭戶部朕頃巡行邊外入喜峰口見有民間田畝

為蝗蝻所傷又聞榛子鎮及豐潤縣等處地方被蝗災者所在間有秋成失望則粒食維艱朕心深切軫念著行該撫親歷直隸被災各州縣通加察勘悉心籌畫應作何積貯該撫詳議具奏其被災各地方明歲錢糧若仍照例催科小民必致苦累著俟該撫察報分數到日將康熙三十一年春夏二季應徵錢糧緩至秋季徵收用稱朕體恤民生休息愛養至意

十九日

上諭諭戶部河南一省連歲秋成未獲豐稔非沛特恩
蠲恤恐致生計艱難康熙三十一年錢糧著通行蠲免
併漕糧亦着停徵至山西陝西被災州縣錢糧除照分
數蠲免外其康熙三十一年春夏二季應徵錢糧俱着
緩至秋季徵收用稱朕眷愛黎元撫綏休養至意
自罷兵十數年來凡被兵及運饟地方歲有捐租之
命洊及內地已已

南巡視河所過蠲租如山東江南浙江諸省蠲至二千

餘萬真亘古所稀觀也萬年有道之長實基此矣

琉球國中山王臣尚貞奏為籲

恩題請歸養以廣

皇仁事據臣國入監官生梁作楫等啓稱等于康熙二十五年遵

旨同貢使進京入監讀書抵今四載感荷

皇仁優恤之恩給以廩餼衣服楫等雖頂踵俱捐

天恩莫報况學海之淵源深邃

聖朝之法制昭明雖終身寢食其中亦楫等所深願但緣貢使毛起龍等入京得接家信知父母衰老倚閭望切楫等雖三冬之講究宜深而一本之瞻依倍摯此陳情表所以有報劉日短之語也叩乞恩賜具疏題請歸國等情據此該臣貞案查康熙二十三年蒙冊封天使汪楫題准臣國陪臣子弟入監讀書臣貞遵奉

俞旨業於康熙二十五年遣官生梁成等三人同貢使魏應伯進京仰荷

皇上令其入監讀書月廩廩餼季給衣服正梁成楫等
感泣

高厚殫心誦讀之時也但伊父前經節次入貢萬里梯
航罔辭勞瘁今皆年老奉養需人臣貞亦當念之矣且
梁成楫等三人俱未有室父母之願人皆有之況臣國
人皆愚昧自成楫等進監之後臣貞望其返國與臣言
忠與子言孝以宣布

皇上一道同風之化更為不淺今據梁成楫等乞題請

歸養等情應否准其歸養臣貞未敢擅便伏乞

睿鑒云云予官祭酒時琉球國王奏遣梁成楫等赴京
入監讀書未至而予遷詹事去至是已數年聞成楫等
學頗有成即制舉文字亦能為之

本朝文教之遠信前代所未有也部議梁成楫等三人
照都通事例賞賜仍

賜宴禮部遣歸國

琉球國中山王臣尚貞誠惶誠恐稽首頓首上言伏以

皇圖永奠開萬年歷數之祥帝德廣敷昭一統車書之盛輯五瑞班五瑞瞻紫閣而肅朝儀玉萬方帛萬方望丹墀而宣正朔一人有道四國傾心恭惟

皇帝陛下道隆堯舜德邁湯文秉二十九載之乾綱善述善繼承億萬千年之道統惟一惟精四海為家普天悉遵聲教萬邦歸命率土盡入版圖臣貞僻居海島世沐

天恩欲瞻雲而未從僅望風而拜祝敬遵朝貢之期敢

憚舟車之險專遣陪臣溫允傑金元達等謹賫土物之
微聊效野芹之獻伏願

睿算無極

聖學彌新綜百王之心以為心常調玉燭馭千聖之治
以為治永固金甌則社稷光添景星與慶雲並見而山
川繡錯醴泉與芝草偕生矣臣貞無任瞻

天仰

聖激切屏營之至

安南國王黎維禎誠惶誠恐稽首頓首謹上言伏以
皇極居中用錫九疇之福藩侯奉上遙馳萬里之誠驛
路三千龍階咫尺臣欽惟

皇帝陛下聰明天錫聖敬日躋端袞冕于九重雍容帝
象執玉帛者萬國森集王廷凡仰照臨咸孚親戴臣遙
居丹壤密拱

紫宸貢惟齒革羽毛仰遵夏典壽如岡陵日月願上周
詩臣無任瞻

天仰

聖激切屏營之至

一日與理事勞書升

辨

錢方來

晉錫

同在署見文書有人

名螭螭者頃之勞語錢曰聞津門螭不時至市直甚昂

予笑謂曰公適見紙上郭索食指欲動耶二君為一笑

十月初四日殿試天下武舉人王式坦等初五六日

上御西苑觀騎射七日臚傳狀元張文煥陝西寧夏人

晁以道說之嵩山集十九卷有邢居實墓誌中云趙括

少談兵而父奢不能難者非不能難也不欲怒之也劉
歆之異同其父向者非為斯文漢廷與新室不可並處
也如惇夫於父尚書則於斯文而不能難者也是曾參
之事點也非曾元之事參也又曰魏武之子倉舒十三
歲而存則漢之存亡雖未可知必不至於殺荀文若輩
矣前輩立言婉而直如此

兵部職方司督捕主事康莊說李卓吾所居馬誠所

經綸

御史別業在通州城中東南隅近文昌閣潞水曰蓮花

巷今為袁氏園亭其墓在北門外里許園為馬厰墓上
僅存古柏一株劉僉都廷諫作袁住傳云袁住通州人
日為馬侍御家傭水李卓吾寓於馬氏多嫚罵縉紳輩
相接或終日不與語一見袁住輒曰好男子好男子或
一日不見輒曰目中何無袁住然住形貌嵬瑣傭水外
無他能無以異衆人也卓吾死詔獄方暑尸腐馬氏諸
僕亡敢近者獨住直前抱持痛哭殮含曲盡其事噫袁
住至性耶卓吾前知耶抑無心之遇如佛家所謂動止

皆因者耶

無錫門人劉雷恒震修寄華子潛巖居稿至予題其卷
曰向嘗與學子論詩云工于五言不必工于七言工于
古體不必工于近體觀鴻山及唐孟襄陽集可悟今人
自古樂府古詩十九首已下無不擬者乃妄人也

門人常熟陸輅次公昔為恩縣令遷東昌別駕適補撫
州以石田翁秋山晴靄圖卷贈別卷長三丈餘筆墨蒼
勁邱壑崇深殆絕作也自題云向予所臨松雪翁秋山

晴靄卷適與匏翁此詩有合用呈請正不識當作是觀
否弘治五年四月望後有吳匏菴題詩云長松忽生風
淙瀨復濺濺喬岑植秋宇翠色映雲鮮中有高世士攜
琴寓心賞逍遙與物平道靜地相養恤茲林壑致本超
塵土踪二者各有取不必求其同末有嘉靖乙丑雅宜
山人王寵跋云石田翁畫如裴令公粗服亂頭皆好

以詹事府少詹事兼翰林院侍講學士徐潮為通政使
司通政使侍讀學士李錄予為少詹事會吏部疏言京

堂官多缺員

上命以翰詹官改補自庶子至編檢悉列上

欽點左春坊左庶子李應薦為太常寺少卿翰林院侍
講顧藻為兵部督捕右理事官仍提督順天等處學政
國子監司業吳涵編修王九齡俱通政使司左參議右
庶子高裔司經局洗馬周清原俱通政使司右叅議侍
講熊賜瓚大理寺丞侍講勵杜訥光祿寺少卿侍讀胡
會恩鴻臚寺少卿

內閣等衙門進平定方略七十卷

讀元氏白氏長慶集婁堅子柔二序紆餘唱歎真古文也子柔嘉定人與唐時升程嘉燧李流芳齊名萬厯末婁之文程之詩號吳中二絕崇禎中有臨川傳占衡字平叔能古文在艾南英之上入

國朝言古文者益多如婁傳者予未見其比也占衡乃天啓中閣黨給事中櫬之子

鄭夾漈閩人于西北地里水道多不能詳康對山武功

志常辨其漆漳二水自富平入渭之非予未暇他引即就予鄉之水考之淄水杜云出泰山梁父縣西入汶班云出萊蕪縣原山東至博昌入濟桑欽云出萊蕪原山東北入海漁仲云考其形勢當以杜言為正按淄水出益都縣顏神鎮東南岳陽山東麓即原山也北逕馬陵俗名長谷道今青石關是也于侍郎齊乘云即晉郗克追齊至馬陵賈逵云馬陘東北逕牛山折而北漸臨淄東城又東北逕安平故城北又東北逕樂安城東又北至馬車瀆合時水入海今淄水流

經臨淄城南十里沙石迅急東北至樂安境與時水同
入海與汶水判若秦越安得有西入汶之理以此推之
通志之外訛多矣

十七從叔祖季木

象春

仕南吏部考功郎中以詩名萬厯

間與文光祿天瑞翔鳳齊名然今所傳問山亭前後集
汰其蕪雜擷其菁英可傳者尚可得什之二三也少時

詩如故人江漢絕疎雨戶庭過之句不減大復蘇門八

叔祖伯石

象艮

仕為姚安府同知著迂園詩集詩名遠出

考功下然謹守唐人矩矱不失尺寸如咏魯仲連云孤
城一飛矢六國有心人又蕭條兩岸柳悵悵五更雞魚
藏蘆底穴雪壓竹門廬青熒茅舍火縹緲竹林烟南雁
迎花早東風帶雪多月明才十日人病已經旬皆五言
之選也後人不振予購其刻板藏之十八叔祖晦甫象明
著鶴隱雨蘿諸集才不逮考功而欲馳驟從之故時有
銜蹶之患未能成家今刻版僅有存者予有三公詩選
頗有可傳

再從伯與玫字文玉甲辰進士中書舍人從兄士驥之父也好為艷體少時有悼亡詩句云二十五年將就木
一千里路不通書欲喚小兒求夢草定呼妙子到稠桑
煢煢白兔東西顧恰恰黃鸝四五聲通德每宵談秘事
清娛隨處品名山皆工有籠鶯館集行齊魯間

工部尚書高爾位右侍郎王承祖罷以吏部左侍郎兼
翰林院學士李振裕為工部尚書漢軍內閣學士兼禮
部侍郎年遐齡為工部右侍郎

元微之詩顧我無衣搜蓋篋本集注蓋草名今刻作畫
篋字形之譌也段柯古連句詩蝶間移忍草忍草雜蘭
蓀忍皆作忍

以內閣學士兼禮部侍郎彭蓀遜為吏部右侍郎仍兼
翰林院學士

翰林院侍讀學士王拱侍讀學士李紳皆內閣學士兼
禮部侍郎舊制內閣學士滿洲六員漢軍漢人各二員
至是漢人用三員與翰林掌院凡四學士云

十二月初二日內閣傳集九卿宣

諭旨欲盡蠲三十一年天下直省漕糧漕糧自前代無
蠲免之例

浩蕩之恩三百餘年勅見也時九卿議各不同有未正
糧之外向有餘米京師地大人衆胥仰給焉若漕艘不
至京師米價翔貴於事體未更或謂此固當慮只須分
省分年作三年遞為蠲免則

皇仁普遍而京師米價亦平矣遂具兩議啟

奏

上以分省遞蠲之議為然頒

上諭云朕撫馭區宇三十年來早夜圖維惟以愛育蒼生俾咸臻安阜為念比歲各省額徵錢糧業已次第蠲豁其歲運漕米向來未經議免朕時切軫懷所有京通倉米穀搏節支給數載于茲今觀歷年儲積之粟恰足供用應將起運漕糧逐省蠲免以紓民力除河南省明歲漕糧已頒諭免徵外湖廣

江西浙江江蘇安徽山東應輸漕米著自康熙三十一年始以次各蠲免一年至江寧京口杭州荊州大兵駐防地方亦應預行積貯將康熙三十一年起運三十年漕米各截留十萬石存置倉廩令該地方官敬慎守視以備需用爾部即遵諭行

王氏談錄云李廷珪墨凡數等其作下邳之邳者為上作圭潔之圭者次之作珪璧之珪者又次之其云奚廷

珪者最下又云公在濠梁彭門常走人取兗州善煤手
自和揉妙為形體光色與珪相上下此又宋人重兗
墨之一證也

辛未冬京師民家生子一身兩首眉目耳鼻皆具

濮州門人王家楨亮工言明末榆林賊起以濮州范縣
為窟穴蔓延朝城觀城鄆城武城諸縣凡數百里始因
地荒不耕榆錢落地歲久皆成大樹賊首任七張七等
嘯聚其中饑民歸之號百萬官軍至無徑路可入賊又

掘地道出入無時屢敗官軍行旅裹足者幾二十年至
順治十二年黃河決荆隆口水灌榆林樹盡榴地道亦
壞無餘官軍乘之乃滅賊蓋有天意焉從來崔符弄兵
必因山川險阻自固此賊獨以榆林為地利亂東究之
境者將二紀亦史傳所罕覩者故備著之

陸文定公樹聲長水日抄云淄川楊宏道著六忍一日
忍觸觸者人犯我也二曰忍辱辱者人陵我也三曰忍
惡惡者我憎人也四曰忍怒怒則憎之重也五曰忍忽

忽則憎而發之輕也六曰忍欲欲者貪而不知止也此
吾鄉前輩格言惜未詳其生平本末當考之

長水日抄云東坡翰墨在崇寧大觀間盡令焚毀及宣
和間上自內府搜訪一紙至直萬錢而梁師成以三百
千取英州石橋銘譚稹以五萬錢輟月林堂榜書三字
至幽人釋子寸紙尺幅皆重購歸之觀此則坡公著作
書翰不至南渡而始貴重矣

予嘗辨周文襄媚閹事書之前卷冬日偶閱陸儼山願

豐堂漫書一則云周文襄忱巡撫江南日王振新作居

第

今京衛武學是

公預令人度其齋閣使松江作剪絨毯遺之

覆地不失尺寸振大喜公在江南凡上利便事振悉從中贊之然則前說亦未必無事實也隱忍以就功名不顧名節掃地雖有功德于吳中豈足道哉

陸文裕深金臺紀聞云葉石林時印書以杭州為上蜀本次之福建最下又云比歲京師印板不減杭州蜀閩多木柔木刻之取其易售今杭絕無刻國初蜀尚有板

差勝建刻今建益下去永樂宣德亦不逮矣唯蘇州工匠稍追古作此嘉靖初語也近則金陵蘇杭書坊刻板盛行建本不復過嶺蜀更兵燹城郭邱墟都無刊書之事京師亦鮮佳手數年以來虞山即常熟縣毛氏崑山徐氏雕行古書頗倣宋槧坊刻皆所不逮古今之變如此其亟也

黃巢張元之事人皆知之貴耳集云儂智高發三解不得志遂作亂兩廣遂有兩解試攝官之格後村詩話云

李振勸朱溫殺朝士于白馬驛蘇楷駭昭宗謚李山甫
教樂彥輔害王鐸三百口皆不得志于場屋者為之也
唐文皇御端門見進士綴行而出喜曰天下英雄入吾
彀中真帝王之偉略也釋同揆洱海叢談云

貴耳集又云張元因殿試落第徑往西夏自此殿試無
黜落之士此又與前卷所載不同併記于此釋同揆洱
海叢談云儂智高終于大理府

會試進士呈十卷候

御筆批定會元已下名第始於康熙乙丑然考之玉堂漫筆宋朝故事每廷試卷前十名御藥院先以文卷奏御定高下高宗建炎間始罷之古之人亦有行之者矣
今

殿試第三日讀卷官例擬鼎甲三人及二甲前七名凡
十卷進呈

御覽性往有

改易者不盡依所擬名第也

特遣戶部左侍郎阿山往陝西動支正項銀二十萬兩
賑濟西安鳳翔二府饑民

上諭諭禮部自昔帝王敬天勤政凡遇垂象示儆必實
修人事以答天戒頃欽天監奏推算日食當在三十一
年正月朔日夫日食為天象之變且又見於歲首朕兢
惕靡寧力圖修省大小臣工務精白乃心各盡職業以
稱朕欽承昭格至意其元旦行禮筵宴着停止

曹州五色牡丹天下第一居人于花園種植左牡丹右

芍藥則花繁盛反是則不花花亦不繁

予于慈仁寺市得徐一夔始豐稿文十四卷無詩陳繼
儒嘗稱一夔宋行宮考吳越國考研檢精確予觀集中
如歐史十國年譜備證錢塘鐵箭辯等篇皆極精核不
獨二考也

中酒之中平聲中興之中去聲然又有不盡然者王楙
野客叢談引漢書樊噲傳軍士中酒注竹仲反齊已詩
穠低似中陶潛酒作去聲祖此予按葉石林建康集次

韻程伯禹次章云漢道中興此一時作平聲石林號博雅必有所本

竹垞說吳門陸醫士其清家有洪炎玉父集元人稅汝權易啓蒙小傳顧阿瑛選元人詩亦名玉山雅集又阿瑛選張伯雨詩皆毛氏刻十元人詩所不載

門人新安江閩辰六說前知均州日在武當親見一黃冠無名字其髮縮結人以縮頭道人呼之長鬚斑白短鬚及腦後頂髮盡黑髮多且長齒暫白完固面似七十

歲人飲食步履如少壯自言程姓歷城人也生嘉靖三十年萬厯初元即入雲夢山為道士萬厯間曾歸濟南至泰安州為蕭尚書

大享

療病後此遊於四方

國初至普陀後住中州往來懷慶南陽間順治中來武當已復去邇年重來結茅七星樹側辰六見之在戊辰康熙二十七年也上距嘉靖三十年蓋百五十歲矣

長短經十卷總六十三篇唐梓州郪縣草莽臣趙蕤撰其文亦申鑒論衡之流蕤自序云大旨在乎寧固根蒂

革易時弊興亡治亂具載諸篇此書流傳絕少徐健菴
過任城得之市中者宋刻也按楊天惠彰明逸事云潼
江趙挺任俠有氣善為縱橫學著書號長短經

鐵樹予昔在廣州見之著於皇華紀聞勞少卿書升

之辨

言其大父方伯宦閩日曾攜二株歸植之廳事甚鬱茂
可蔭數弓喜食鐵歲以鐵屑如泥土壅其根又以鐵釘
釘之即如他木得水灌溉然乙巳江浙大寒二株皆凍
死

宋高僧詩前後二集錢唐陳起宗之編多近體五言予按前集即六一詩話所謂九僧詩也所稱春生桂嶺外人在海門西希畫句也馬放降來地鵬盤戰後雲宇昭句也今具載集中當永叔時已云其集不傳世多不知所謂九僧者而此集更歷六七百年完好如此殆不可曉又按周輝清波雜誌云昔傳九僧劍南希畫金華保暹南越文兆天台行肇沃洲簡長青城惟鳳江東宇昭峨眉懷古淮南惠崇名字與今本悉合又云九僧詩極

不多有景德五年直史館張亢所著序引惠崇人遊曲

江少草入未央深之句皆不載疑為節本或即此本是

也今亢序亦不載大抵九僧詩規撫大厯十子稍窘邊

幅若河分岡勢斷春入燒痕青自是佳句而輕薄子有

司空曙劉長卿之嘲非篤論也今摘其秀句列於左方

希畫捲幕知來客懸燈見宿禽

吏隱亭

千峰臨積水秋勢

遠相依路在深雲裏人思絕頂歸

送僧歸雁蕩

故國寒潮潤

春城夜夢長

書惠崇房

會茶多野客啼竹半沙禽

宋侍郎林亭

春

齋山藥徧夜舶海書通

寄壽春陳學士

微陽生遠道殘雪下中

宵

寄觀公

秋聲動羣木暮色起千山

送李堪

保暹城中無舊

識門外是他山

書惟鳳壁

高樹下殘照寒潮平遠山

文北水閣

野

禪依樹遠中飯傍泉清

送簡長

懸厓乘雪度飛瀑過雲看

寄白閣元貞

山影到平地湖光生四鄰

送蔣白

半空山遠近寒

日水東西

徐希別業

深院無人語長松滴雨聲

寄宇昭

文兆吳

楚十年客蒹葭一夜風

寄希畫

諸峰微下雪一路獨行僧

送宇昭

一徑杉松老三更雨雪深

宿西山精舍

行聲列樹無殘

陰積水有異光

中

達士絃性直佞人膠辭柔靳尚一言

巧靈均千古愁

湘江

野宿清溪深月在諸峰頂

送希畫

之九華

遙山去意長大江歸夢直

送惟鳳

心絃世寡聽意鑑古亦

稀

送從律

春通三徑晚家別九江遙

贈夢真上人

宿館荷香接

吟亭島色圍

送蒲奉禮

簡長朱絃愁零落古意空徘徊

懷盧叔微

藉茲徘徊芳強起寂寞遊

步春謠

落日懸秋樹寒蕪上廢

城

次江陵

寄禪依鳥道絕食過漁村楚雪粘旂凍江沙賤

衲昏

送行禪師

惟鳳林泉歸計晚雨雪向春多

答寧昭

客路逢

人少家書入闕稀

寄希書

靜卧侵仙掌微吟隔楚波

寄文兆

惠崇河冰堅渡馬塞雪密藏鵬

塞上贈王太尉

獨鶴窺朝講鄰

僧聽夜琴

贈文兆

海帆通夜市山雨遍春耕

送安學士之睦州

三

年不下嶽衣履古苔侵

贈吳黯山人

水烟常似暝林雪乍如

春

林逸人壁

五月無青草漳沍流斷冰

古塞下曲

夕景孤嶼明暗

蟲四鄰響

剡中秋懷希書

宇昭白道沿嵩直青蕪夾渭長

送從律師

試泉尋寺遠買鶴到家遲

贈魏野

懷古算程芳草盡去國

故人稀

送田錫

遠水去無極離人來幾時

霸陵秋居酬友人

白髮

有先後青山無古今

爛柯山

中間惟行肇詩學孟東野但

全體微弱耳後集以贊寧壓卷凡三十一人文瑩道潛

清順皆在焉文瑩常撰玉壺清話道潛即參寥清順為

東坡所賞續集十九人以祕演壓卷惠洪守詮皆在焉

祕演歐陽永叔友守詮亦東坡所喜而惠洪名尤著許

彥周詩話云覺範題李愬畫像云云當與黔安並驅

黔安

謂山谷仲殊參寥雖名世皆不能及也

予嘗厭古今注杜詩者而深服陸務觀不敢注蘇詩

之說如劉會孟本須溪與其子將孫二序深契言外之意自謂如郭象注莊偶看至已公茅屋下一首引歐陽公云已公齊已也按齊已唐末人客荆南高氏豈得與子美同時此注不知果出永叔否以此例之古今注家訛謬可勝道耶

居易錄卷十四

欽定四庫全書

居易錄卷十五

刑部尚書王士禎撰

張文潛來宛邱集論樓護云所貴乎遊俠者為其身任人之患難而脫人於厄也朱家郭解雖不合於大義而其感慨雄俊先人後己故可取也樓護平生齷齪無可稱呂寬得罪王莽以其父故窮歸之豪俠立節無如此時謂宜斬莽使脫寬於死身自亡匿或以身任之而不悔如此而謂之俠可也護得詔書即日斬寬以聞莽大

喜此苟偷畏懦閭里負販人耳當莽時天下畏威誰非
護者而班孟堅列護與朱家郭解同謂之俠此何故也
泣涕責妻子使終養呂公此朱家郭解糞土之餘耳何
足道哉此論見郝梁所刻文潛集而六家文粹不載予
向者持此論常著之池北偶談不知文潛先得我心也
梁號龍泉山人未詳何代人

唐周曇詠史絕句上下二卷起唐虞訖隋凡二百首每
首有論斷綴詩後詞旨陳腐亦胡曾之流也曇不知何

時何許人全唐詩話唐詩紀事皆不列其姓名此集乃
禾中項藥師寫本

黃鼠榆肉皆大同產珍味也菽園雜記云捕黃鼠必以
鬆尾鼠一名夜猴兒能嗅黃鼠穴知其有無有則入嚙
其鼻而出如蜀人養烏鬼以捕魚也清暇錄引澠水燕
談云契丹國產大鼠曰毗狸以為殊味或即此陸氏舊
聞云畏日為隙光所射輒死

康熙三十一年壬申正月辛亥朔免朝賀羣臣齊集午

門追班內閣大學士稽查甚嚴午初赴禮部行救護禮
日食自午初三刻三分始至未時正二刻三分復圓食
五分十七秒日躔虛九度危三度禮畢仍赴午門是日
風寒

初二日午門追班有

旨會議陝西西安鳳翔二府常平倉積貯米穀備賑良
法及各直省常平倉米數時西安鳳翔饑撫臣以聞

特遣戶部侍郎阿山發銀五十萬兩支給兵餉賑濟饑

民又蠲三十一年正賦至是又慮今年年歲豐歉未可知故預為備荒之計

聖慮之軫切民依如此

初三日九卿會議西安鳳翔二府常平備賑應照各直省常平倉見行事例援納監生官員紀錄富民頂帶三款舉行其米數減半時甘涼見行邊儲事例較減半之數每一百石少四十石恐捐納人等不肯舍少就多予以班次再四言之因退與刑書陳公說巖工書李公醒

齊左都御史于公振甲刑侍鄭公山公李公奉倩副都
李公貞孟黃公萊園等另為一議上之

初四日有

旨召內閣滿漢大學士滿漢尚書左都御史吏部漢侍
郎彭孫適兵部滿漢侍郎朱都納李光地翰林院漢掌
院學士張英等入

上御乾清門

命禮書熊賜履兵侍李光地學士張英近

御座

上指示諸圖論古今樂律得失大旨以隔八相生為合
圍三徑一為未合復

命侍衛鼓瑟教坊司吹管以驗之再試江南桐城監生
方正珠開方立方算法移晷而退方明崇禎庚辰進士翰
林檢討以智之孫也隔八相生謂宮一徵二商三角四
羽五變宮六變徵七八復為宮李少司馬云自昔論樂
律諸家無人研究及此

初五日早朝午門追班午刻內閣大學士伊桑阿等傳上諭陝西及各直省常平倉上州縣五千石中州縣四千石下州縣三千石令戶部稽查其數未足者著發正項錢糧糴買備賑會議疏發出

初六日會議常平倉西安鳳翔二府遵

旨發正項錢糧採買其餘各直省數未足者仍照見行事例捐納初稿有勸輸之語予與于總憲共言之而止
世傳李易安詩露花倒影柳三變桂子飄香張九成葉

石林避暑錄話云子瞻于四學士中最善少游常戲云
山抹微雲秦學士露花倒影柳屯田李蓋襲蘇語

李少司馬厚菴說黃石齋先生

道周

配蔡夫人今年將九

十尚無恙能詩書法學石齋造次不能辨尤精繪事常
作瑤池圖遺其母太夫人云

史傳記載有可疑者如三國志關侯傳注曹操圍呂布
於下邳侯啓操布使秦宜祿行求救乞娶其妻操許之
臨破又屢啓於操疑其有異色先遣迎看因自留之侯

心不自安又姚寬西溪叢語云范文正仲淹守鄱陽喜
一樂籍未幾召還到京以綿胭脂寄其人題云江南有
美人別後長相憶何以慰相思贈汝好顏色至今墨蹟

在鄱陽士大夫家以二公風節行義殊不類何耶

泰朗
宜祿

之子與何晏并養
官中視如公子

初十日同李容齋太宰齋宿

天壇十一日陪祀畢仍赴午門坐班

十一日祭祈穀壇

上偶患癰未痊令內閣禮部太常寺集議查照典例請遣官恭代

上疑之初七日復下九卿集議議如前閣臣啓奏得俞旨仍令照例進銅人於宮中齋戒蓋

上登極三十年以來凡

郊

廟大祀無不躬親雖大雨雪必出敬

天尊

祖久而勿怠如此

凡祭祀則太常寺預進銅人置乾清門銅牌南向銅人西向

十五日常朝朝罷九卿仍追班與李容齋太宰杜肇余
大司馬李厚菴少司馬憩於朝房予談及吏禮二部翰
林院國子監土地皆祀韓文公或詰其故予謂韓嘗再
為吏部侍郎國子祭酒贈禮部尚書獨未嘗為翰林學
士耳厚菴謂退之不作祭酒予按文公本傳吳元濟平
遷刑部侍郎上表諫佛骨貶潮州刺史移袁州召拜國
子祭酒轉兵部侍郎宣撫鎮州歸轉吏部侍郎特其先

亦嘗再為國子博士故人多不察耳

春秋之世人材衆多婦人亦通達古今魯之敬姜固卓然不可及如南子淫婦人也而知蘧伯玉車聲穆姜淫婦人也而其論易隨卦云云夫子作文言取之皆非庸女子也南子知不為冥冥墮行而不恥婁豬穆姜自言棄位而姣不可謂貞而幾亂魯國不可解也

龍蛇歌本介之推事左傳史記呂覽并同說苑乃作舟之僑又不載綿上事而云歷階而去文公求之不得按

左氏僖二十八年城濮之戰壬午濟河舟之僑先歸七月丙申振旅凱入于晉殺舟之僑以徇于國二子事跡顯然如此乃以舟為介可乎又說苑新序皆劉向著書新序以為介之推與說苑自相矛盾尤不可解

歷階而去求之

不得語亦近兒戲

石鼓文正誤二卷正德中絳人陶滋時雨撰其自序云周宣王石鼓文十其義與車攻吉日之詩相類而辭亦間有同者鼓距今垂二千三百餘年散而復合晦而復

明意者神物護持如韓昌黎之所言哉不然何歷年之遠若是也宋薛氏尚功鄭氏樵施氏宿王氏厚之各為訓釋不能無議焉者如以時作時矢作尖霰作霧舛譌甚多不可殫舉然諸家皆為模本所誤石鼓蓋未之見也元潘氏迪取諸家說重為考訂間亦以塗作即阪作陟夫迪親見之猶混魯魚矧諸家乎滋躬詣鼓旁詳加摩玩文之漫剝者猶隱然有跡可辨也乃筆之以歸沈潛其義參考諸說是者取之誤者正之其未詳者不敢

強為之說鼓之所自諸家考辨已明不復容喙乃以王氏辨疑及古今歌詠附載于後以見是鼓也直為周宣之物好異者不煩詭譎云爾又曰滋以正德戊寅歲作石鼓文正誤甫成編以諫止南狩觸罪坐斥橋門一日過寮友國博陸君俊卿家見几上有舊書一冊取而閱之乃宋蘇文忠公石鼓文摹本也刻之者為維揚歐氏本源歐得之於甬東楊氏準不知楊得之何人滋幸天之未喪斯文也因假歸叅校同異滋藏舊本四百六十

五字蘇本六百一十一字九鼓篆籀皆完惟一鼓僅存
其半惜薛尚功輩為音釋時不獲見此蓋文完則義足
而字之辨也易文闕則義晦而字之辨也難矧石鼓之
字畫奇古句讀聲牙顧復闕其文乎然諸家音釋之誤
無足怪者滋合舊編重為刪定撫諸家之說并引經傳
可為證者載於下將質諸博洽君子此書淄川畢州守
戴積家有舊刻本朱檢討彞尊著日下舊聞畢寫寄之
予得觀覽焉陶與趙師尹皆絳州人明世宗將上恭穆

獻皇帝尊號滋時為郎中與豐熙張翀等伏哭左順門遣戍

門人江閭辰六云順治丙戌益陽縣覃家園民家瓜棚有二瓜大如盆盎相距三尺許每夜犬吠其下不止月夜覘之則二瓜相擊如鬪狀明日剖視之中各有蝦蟆一躍出投火中亦無他異

余知古渚宮舊事載昭王反郢樂師扈子侍引琴而歌曰王兮王兮聽讒邪枉殺左右冤伍奢二子懷恨東奔

吳創讎構禍破國都鞭尸戮骸丘墓屠賴申包胥人獲
蘇王雖返國憂未徂右與吳越春秋窮劫之曲全不同
楊升菴風雅逸編馮少洲風雅廣逸俱未收入又載樊
姬琴歌曰忠信言兮從正不邪衆妾進兮繼嗣多二書
亦未及楊馮皆博極羣書何未覩此

唐闕史首載丁約劍解事謂約從逆帥李師道被獲獻
俘闕下臨刑用幻術以筆代已自云歸崑崙石室矣語
云天上無不忠孝神仙約何為者吾郡長山劉孔和節

之有詩云淮南叛諸侯趙高賊宦官神仙乃如此何足容褒彈真篤論也否則如淮南以叛誅死而道書猶妄為雞犬皆仙之說以誑輦俗是導逆也豈可以訓

宋太學生丁特起泣血錄載金人入汴駐青城索監書藏經如資治通鑑蘇黃文集之屬皆指名取索當時朝廷行下諸路盡毀坡谷著作奸黨傳會至欲焚資治通鑑賴有神宗御製序文乃不敢毀而敵國之敬重顧如此宋欲勿亡得乎

朱晦翁亦謂溫公資治通鑑虛費一生精力尤不可解也

羅大經鶴林玉露一條論揚雄云莽之行如狗彘三尺童子知惡之雄豈肯附之劇秦美新不過言孫以免禍耳予鄙之判其側云危言既不可不言庸何傷

清暇錄元人撰自署灌園耐得翁書凡六卷多刺取諸家小說成之異聞殊少

卻掃編睢陽徐度撰專詳宋累朝官制沿革同異之故亦有用之書也度為宰相處仁子處仁仕政宣間靖康初拜中書侍郎獨能不附京貫以剛廉稱其在東京末

亦庸中佼佼者也

東阿魚山即曹子建聞梵處有墓在焉山上有臺二曰

柳書曰羊茂

見隋碑

皆傳為子建讀書處二臺名義不甚

可解魚山一名吾山即漢武帝瓠子歌所云吾山平兮
鉅野溢是也

廣西鎮安府五指山與交趾相鄰產水晶彌望如雪其
巨者或取作假山長至丈餘此慶遠人李文鳳月山叢
談所載

月山叢談言何大復督學關中諸生進謁方揖跪何命
之起再跪何不語諸生竊視之見頭小垂氣已絕矣後
數日有人自潼關來云見何騶從屏避路側計所見日
時即何卒之日時也予按大復先生以正德戊寅自吏
部出督陝西學政辛巳二月病嘔血六月棄官歸汝南
抵家六日而卒卒時與門人樊鵬少南訣曰死生常理無
足悲但吾生多辛苦耳樊作行狀孟洋有涯大復之姊
夫也作墓誌銘其言鑿鑿如此叢談何據而為此妄語

耶故知小說家言不足盡信

華陽集四十卷宋資政殿學士諡文簡張綱彥正所著
洪景廬序之綱嘗進劄子言元祐黨籍之家推恩太濫
因得旨看詳元祐黨籍內曾任宰執侍從臺諫等官顯
有名德者具狀聞奏臣等今看詳黨籍人姓名見于碑
刻者共有二本一本計九十八人一本計三百九人雖
皆出于蔡京私意內九十八人係崇寧初年所定多得
其真其後蔡京再將上書人及已所不喜者作附麗人

添入黨籍泛濫冗雜增至三百九人看詳九十八人內
除王珪不合在籍自餘九十七人多是名德之臣所有
三百九人豁除九十七人係前石刻所載其餘數內更
有侍從官上官均岑象求及餘官江公望范杲中鄧考
甫孫諤等六人名德亦顯然可見共計一百三人依得
累降推恩指揮所有今來臣寮上言許子孫陳乞恩例
次數伏祈付三省措置施行宰臣文彥博七人

潞公司
馬溫公

呂申公呂汲公劉忠
肅范忠宣韓義公

執政梁燾等十六人待制已上蘇

軾等三十五人餘官秦觀等三十九人予按看詳黨籍以初碑為據而削去王珪是已然執政中如李清臣侍從中如賈易楊畏尚竄名其間豈為定論而宰臣無蘇頌亦不知何也按小學紺珠合元祐黨籍建中上書邪等兩籍三百九人龔頤正作列傳譜述一百卷凡三百五人不可詳者四人

長白山會仙峯之北游山濼中有墨王亭從叔祖洞庭象咸之別業也米元章稱法書曰墨王陸友仁謂非鍾王

不能當亭名義取諸此洞庭仕明末崇禎時為光祿署
正工草書尤嗜酒酒酣落筆如風雨驟至蛟龍怒飛人
得其紈素便面皆藏弄以為寶今真蹟不易得矣別業今
為鄒平張氏所有亭猶在予少時題句云墨王亭子水
中央四面菰蒲作夏涼周櫟園亮侍郎過此有詩見懷
云獨有墨王亭畔水空明與客憶王郎馮大木樵舍人
愛墨王之名因為道其緣起如此

趙普自言以半部論語佐太祖取天下然跡普生平于

論語似無所得蒙齋筆談載韓魏公自言自少至老終始所踐歷惟一部論語未嘗須臾敢離晚鎮北門韓縝為都轉運使造其臥內几案間不見他物惟一唾壺及論語耳如魏公者乃真讀論語者也

明宗室諸藩生子例由禮部制名主者索賄不滿意輒制惡字予之如崇禎壬午舉人朱慈愆衡府王孫也字火西詩文有盛名愆字蓋取愁人二字牽合之宋趙彥衛雲麓漫鈔云宗籍凡袒免親已上賜名受官或寓不典

之言於其間如令誅令鯨等不可槩舉乃知此風宋已
有之頃予在都院閱揭帖見苗蠻有名阿斬阿亡者尤
可駭笑

天邊趙盾益可畏水底右軍方熟眠昔人有湯燭王羲
之之謔予讀張文潛宛邱集此首乃仲夏詩字句小異
云雲間趙盾益可畏淵底武侯方熟眠若無一雨為施
澤直恐三伏便欲然謂龍眠則亢暘不雨武侯云者如
言臥龍也此謔當更云湯燭諸葛丞相耳與右軍無涉

又相傳有送鶯及梅子札云湯燭右軍二隻醋浸曹公
一瓶傳以為笑故友董侍御文驥玉虬之子常遺風雨
梅子喜其名甚雅戲為口號謝之云吳中五月梅黃雨
想像千林舶趁風珍重遺來香軟齒不須將醋浸曹公

韓致堯詩云

齒軟越梅酸

京師冬月養花者多鬻牡丹芍藥紅白梅碧桃探春諸
花於廟市其法置花樹於暖室地炕以火逼之猶癸
辛雜識所記馬塍塘花

亦作
堂花

之類康熙庚午三月予自

少詹事遷副都御史又旬日馬邑田子湄喜霽亦自少

詹事遷內閣學士一日起居館晤別翰林掌院學士

滿洲掌院學士庫勒納公

今戶部尚書

曰公等亦見冬日鬻

花者乎置之密室鑿池作坎緇竹其下溉以牛溲培以

硫黃篲引沸湯扇以微風盎然春溫經宿而花放矣衆

花固未蓓蕾也及二三月衆花應候而發而冬花已憔

悴視其根則已腐敗久矣蓋春花知命而待時者也

冬花不知命而違時者也仕宦亦然吾見夫冬花之榮

落亦多矣公等今日之擢乃春花也雖遲發亦不速敗
予深感其言類有道者因記之

地氣北寒南燠亦不盡然庚午冬京師不甚寒而江南
自京口達杭州裏河皆凍揚州驛網皆移蘇杭甚至揚
子錢塘江鄱陽洞庭湖亦凍江南柑橘樹皆枯死其明
年京師柑橘不至唯福橘間有至者價數倍齊魯間竹
多凍死按宋時江南大寒積雪尺餘河盡冰凡橘皆凍
死伐為薪葉石林作橘薪以志其異元天厯中亦然

墨客揮犀記鄜州西有相思河相思舖引令狐挺詩誰
把相思號此河云云予昔使蜀過重慶府登塗山其西
北曰縉雲山山上有相思寺生竹形如桃釵名相思竹
寺有迦葉尊者手跡寺以相思名尤奇

李衛公作步虛引云仙家女侍董雙成桂殿夜寒吹玉
笙曲終却從仙官去萬戶千門空月明河漢玉女能鍊
顏雲駢往往在人間九霄有路去無迹裊裊天風吹珮
環許彥周詩話歎為人傑王安石題畫扇云玉斧修成

寶月團月中仍有女乘鸞青冥風露非人世鬢亂釵橫
特地寒此詩之工不減贊皇也鄉人長山張某者工畫
尤好寫毛女圖予嘗得之欲題一詩憶二公前詩瑟縮
而止已未歲同故友施侍讀愚山閨章訪華陰王徵士無
異宏於昊天寺出唐子華水仙圖共觀予為題長句中
有云青峰出沒高歷歷海天萬里迴春潮六銖衣輕逐
風舉飛龍決起橫烟霄摹寫畫中意態頗謂傳神意欲
髣髴二公於文句之外耳

逆藩故平西王吳三桂明之武舉也出江南某公之門
某公歿其子奉母以居貧無以供菽水一日於故書中
得武舉試錄一冊見吳名始悟出父門下時吳鎮雲南
方貴盛欲往謁之以告母母初不可既而貧困日甚乃
許之鬻田質簪珥治裝以行比至滇旁皇岐路不克自
達賣字市中聊給朝夕忽遇藩下護衛詢其籍貫知為
江南士人邀致家塾既半載賓主頗洽因從容言欲一
見王可乎詢其願見之故乃為敘述師友淵源所以然

者護衛諾之一日吳大會寮佐酒間盛言少年時起家科目誇示座客護衛適侍側即跪啓曰王當日出江南某公之門乎吳驚曰然汝安從知此護衛曰某公有子貧困萬里上謁至此無由自通今寄食某所故知之耳吳大喜立召之使預賓筵為重客留府第中數月某以母老告歸吳又大集賓僚祖道贈以二萬金別扁繡一篋為母壽皆珠寶也某歸江南遂為富人惜不知其姓字王少司馬嵎谷

維珍說

馬逢知以提督鎮松江恃恩驕恣所為多不法然好延
致文士會生日賓客雲集為壽一書生預為逢知代製
詩數百篇偽撰名公卿序數篇又代刻之裝潢百本卷
軸燦然是日赴賓筵為獻馬大喜贈之千金吳人傳為
笑柄李太宰容齋說

彭少宰羨門說明末時家有小僕倪素者頗騃一日從
竈前過忽見一婦人紅衣高髻插花滿頭面施粉黛向
竈而坐見素來即起先行至戶外負牆立目直視素其

光如炬身長丈餘素敬嗚呼仆地同輩趨至扶掖始甦數日竟死不數月浙西亂彭氏罹兵難者數人

李太宰容齋又說合肥王通參綱

思齡

歿於京師其家已

聞訃矣有僕某暑月臥堂上中夜忽聞傳呼自外入須臾騶從雜沓於庭有官人升階坐堂中竊視之即主人也屏息久之傳呼而去比曉視門戶尚扃閉也思齡順治壬辰進士以兵部主事假御史銜巡視通倉內陞終通政司叅議

二月初二日內閣九卿會議明史先是正月二十六日
內閣奉

上諭纂修明史事關重大務期秉公持正是非論斷歸
於至當方可稱一代信史著部院諸大臣詳議具奏議
得應照唐太宗御製晉書之例凡事闕諠辟名臣紀傳
恭進請

御製論贊其餘不必槩進得

俞旨

初三日初四日初五日内閣傳

諭九卿會議賑濟陝西西鳳二府饑民又傳

諭先運襄陽積穀十萬石赴潼關其秦中流民在鄖襄者得聽運米還其鄉仍給脚費流民責令各省督撫令所在有司賑濟又截留江北漕糧二十萬石自黃河運往蒲州南運責之河道總督靳輔襄陽陸運

特遣滿洲刑部侍郎傅臘塔往董之

考唐書食貨志唐都長安歲漕東南之粟而河有三門

底柱之險顯慶元年苑西監褚朗議鑿三門山為梁可
通陸運發卒六千鑿之功弗成開元十八年宣州刺史
裴耀卿條上便宜大約謂漢隋漕路瀕河倉廩遺跡可
尋可於河口置武牢倉鞏縣置洛口倉使江南之舟不
入黃河黃河之舟不入洛口而河陽柏崖太原永豐渭
南諸倉節級轉運水通則舟行水淺則寓於倉以待二
十一年耀卿為京兆尹請罷陝陸運而置倉河口江南
漕舟至河口者輸粟於倉而去縣官雇舟分入河洛置

倉三門東西漕舟輸東倉而陸運以輸西倉復以舟漕以避三門之水險乃於河陰置河陰倉河西置柏崖倉三門東置集津倉西置鹽倉鑿山十八里以陸運自江淮漕者皆輸河陰倉自河陰西至太原倉自太原倉浮渭謂之北運凡三歲漕七百萬石省陸運傭錢三十萬緡

家鉉翁春秋集傳詳說三十卷亦崑山徐氏刻本有鉉翁自序高郵龔璘跋云至正丙子宋亡以則堂先生歸

置諸瀛者十年卒成此書自瀛寄宣託于其友肅齋潘公從大藏之泰定乙丑宣學銍梓凡三十卷綱領十篇一原春秋託始二推明行夏時之意三辨五始四評三傳五明霸六以經正例按鉉翁祖大酉名列朱文公黨籍大酉曾祖愿愿父勤國與二蘇為同門友嘗憤王安石廢春秋著春秋新義蓋家學云

清暇錄載趙賓暘云小兒瘡痘以消毒飲升麻湯等解之非也大要在固臟氣之外任其自然耳惟本事方撝

金散最佳又陳剛翁云痘瘡不可多服升麻湯只須以四君子湯加黃芪一味為穩又括蒼陳坡云分教三山日其孫方三歲發熱七日痘出而倒靨色黑唇口冰冷一士人教以用狗蠅七枚搗細和醅酒少許調服移時紅潤如常蠅冬月則藏狗耳中又其次女痘後毒上攻遂成內障一老醫用蛇蛻一具淨洗焙燥天花粉即瓜蒌根等分細末之入羊肝內麻皮縛定用米泔熟煮切食之旬日而愈却掃編云公卿三品以上薨其家錄行狀上尚書省請

諭考功移太常禮院議定博士撰議考功審覆都省集
議具上中書門下宰臣判准始錄奏聞付所司即考錄
牒以未葬前賜其家省官有異議者聽具議以聞

正月十

闕

日內閣傳

諭問九卿故大學士吳正治品行宦業予奏云吳某謹
慎大司寇陳公亦云謹慎小心遂覆

旨

賜諡文僖

却掃編云故事臣僚封贈母祖母不問生歿并加太字
曰太夫人太君政和間劉安上建言太者事生之尊稱
也封母而別之所以致別于其婦既歿並祭于夫若加
以尊稱是以尊臨其夫也以尊臨夫名義未正自是始
詔命婦追封除去太字紹興新書仍復舊制晏敦復引
漢文帝紀七年冬十月令列侯太夫人夫人勿得擅徵
捕注謂列侯之妻稱夫人列侯死子復為列侯仍得稱
太夫人蓋此義也於是追封不復稱太云按帝者之祖

母稱太皇太后既升祔止稱皇后正此比也

朝制誥命至今沿之而學士臨文多有謬誤失之不看耳

皇甫松牛羊日厯云牛僧孺早孤母周氏治蕩無檢鄉里羞賴乃令改醮南部新書云殷僧辨周僧達皆與牛僧孺同母異父兄弟右或贊皇客所為不可知然僧孺小人或不盡妄

蔡京死潭州數日不得殮豪葬漏澤園以青布條裹尸

初宣和間京師染坊有名太師青者茲其識也見清波雜志南唐宮中尚天水碧為宋伐江南之兆


李滄溟視秦中學政某巡撫以檄徵其為文李遂挂冠然此事古已有之清波雜志云數十年前僚屬能文者監司郡守委作箋記必親作簡致叩被公牒撰應用文字亦親署名封達近時此禮俱廢但書司承受傳道公牒則若常程行移上官體貌益崇學士大夫浸失自重此其一也

寶刻叢編二十卷南宋錢唐陳思撰思書賈也直齋陳伯玉序云始歐陽充公集古錄有卷秩次第而無時代先後趙德父金石錄自三代秦漢而下叙次之而不著所在郡邑及鄭漁仲作系時系地二錄亦疏略弗備其他如諸道石刻錄訪碑錄之類於所在詳矣而考訂或缺都人陳思鬻書都市士之博雅好古者又蒐獵遺忘以足其所藏所閱滋多望之輒能辨其真贋一旦盡取諸家所錄輯為一編以今九域京府州縣為本而繫其

名物於左昔人辨證審定之語具著之予故樂序之亦
柳河東述宋清之意云思賈人嗜古如是又能薈萃成
書亦一異人呂成公云京師賢者多市隱鄭武子能徧
識之嘗受太玄於日者何失得之隱居京師織絹紗為
業售不二價喜為詩風調不凡亦此類按宋次道嘗撰
寶刻叢章三十卷與歐陽集古錄同時今不知尚傳於
世否

僧齊己白蓮集十卷風騷旨格一卷有荆南節度副使

朝議郎檢校秘書少監試御史賜紫金魚袋孫光憲序
嘉靖己丑柳僉跋云元書北宋刻傳世既久湮滅首卷
數字當俟善本補完與皎然貫休三集並傳之常熟馮
班鈔本



居易錄卷十五